



Aqqa Samuelsen, Inuit Ataqtigiit
Inatsisartuni Ilaasortaq

**Qeqertarsuup Tunuani kiffartuussinissamik isumaqatigiissutit pillugit § 37
naapertorlugu apeqquteqaammut 2020-173-imut akissut**

22-10-2020
Suliaq nr.: 2020 - 19089
ID nr. 57599201

Asasara Aqqa Samuelsen

Inatsisartut suleriaasianni § 37 naapertorlugu Qeqertarsuup Tunuani kiffartuussinissamik isumaqatigiissutit pillugit Naalakkersuisunut apeqquteqaateqarputit. Apeqqutitit uannit akineqartussatut innersuunneqarput. Apeqqutitit matumap kinguliani ataasiakkaarlugit allanneqarput, akissummillu malitseqarlutik

Postboks 909
3900 Nuuk
Tlf.: (+299) 34 50 00
E-mail: box909@nanoq.gl
Fax: (+299) 34 63 56
www.naalakkersuisut.gl

**Apeqqut 1: Naalakkersuisut qaqugu Qeqertarsuup tunuani ilaasunik
angallassinermut sullissinissamut isumaqatigiissutissaq, ulloq 1. januar 2021
atuutilersussaq saqqummiutissallugu naatsorsuutigaat?**

Akissut: Naalakkersuisut 2020-mi oktobarip 16-iani tusagassiutitigut nalunaarutaat innersuussutigineqarpoq. Kiffartuussinissamik isumaqatigiissutit politikkikkut suliarineqareerpata, Naalakkersuisut nalunaaruteqassapput.

**Apeqqut 2: Naalakkersuisut Takornariartitsinermut immikkoortumut pilersaarutaat
2016-2020 "Takornariartitsinermik Kalaallit Nunaanni ineriartortitsineq – Suut
iliusaasariaqarpat" naapertorlugu "Angallannermut tunngasumik
kiffartuussinermut isumaqatigiissutit angallaffinnut imminnut
akilersinnaanngitsunut tunngasut taamaattumik piffissaagallartillugu siusissukkut
isumaqatigiissutigineqartassapput" – qanoq kingusitsigisukkut nutaanik
isumaqatigiissusiortoqarsinnaava, sulilu tamanna "piffissaagallartut"
isigalugu?**

Akissut: Kiffartuussinissamik isumaqatigiissutissat piareersarneqarnerinut Nalaakkersuisut annertuumik suliaqarput.

Taamaalilluni nunatsinni nunaqarfinnut nunaqarfinniillu kiisalu nunaqarfinnut isorliunerusunut nunaqarfinniillu isorliunerusunut angallasseriaasissamut, angallasseriaatsillu aaqqiissuunneqarnissaanut massakkut Ineqarnermut Attaveqaqatigiinnermullu Naalakkersuisuusup, siulianilu Ineqarnermut Attaveqaqatigiinnermullu Naalakkersuisuusup tapersiissutinik kissaatinillu katersuinikuupput.

2018-ip 2019-illu ingerlanerani angallanneq pillugu isumasioqatigiissitsinerit kommunini tamani ilaatigut ingerlanneqarnikuupput. Siunissami kiffartuussinissami isumaqatigiissutissanut innuttaasut, inuutissarsiutillit kiisalu borgmesterit isummersuutiminnik kissaatiminnillu isumasioqatigiissitsinerni saqqummiussinnaatinneqarlutik. Isumasioqatigiissitsinerni oqaloqatigiinnermi,

kiffartuussinissamik isumaqatigiissutit atuuttut aallaavigineqarput. Tamanna tunuliaqutaralugu ingerlatsisut angallanneq pillugu isumasioqatigiinnerni aamma peqataatinneqarlutik. Malitsigisaanik nunatsinni borgmesterit tallimaasut aamma aggersarneqarlutik Inatsisartunut Naalakkersuisunullu ilaasortanut tamanut, 2019-imi ulluni marluusuni angallanneq pillugu isumasioqatigiissitsisoqarpoq. Tamatuma saniatigut 2019-ip ukiaani Inatsisartut Sanaartornermut Ataatsimiititaliaa immikkut ittumik ataatsimeeqatigineqarpoq, tassanilu Naalakkersuisut takorluugaat, periusissatullu kissaataat ataatsimiititaliamut saqqummiunneqarlutik.

Ingerlatsisunik isumaqatiginninniarnissaq sioqqullugu kissaatit, pisariaqartitsinermillu misissueqqissaarneq nutarterneqarnikuusut, Ineqarnermut Attaveqaqatigiinnermullu Naalakkersuisup nunami borgmesteriusut tamaasa immikkut 2020-p upernaani ataatsimeeqatigai. Tamatuma saniatigut Inatsisartuni partiit siulittaasui Ineqarnermut Attaveqaqatigiinnermullu Naalakkersuisup ataatsimeeqatiginikuuai, tassanilu Naalakkersuisut takorluugaat periusiilu eqqartorneqarlutik.

Tamatuma saniatigut Naalakkersuisut Siulittaasuata Naalakkersuisoqarfianit, Aningaasaqarnermut Naalakkersuisoqarfimmit, Peqqissutsimut Naalakkersuisoqarfimmit, Ilinniartitaanermut Naalakkersuisoqarfimmit kiisalu Ineqarnermut Attaveqaqatigiinnermullu Naalakkersuisoqarfimmit inuttalerlugu, naalakkersuisoqarfiit akimortumik aqutsisoqatigiivini Naalakkersuisut pilersitsipput. Isumaqatiginninniarnernerup ingerlanera, aaqqiissutissat, aningaasaqarnermut kinguneqaataasussat il.il. pillugit aqutsisoqatigiit ataavartumik saqqummiivigineqartarput. Tassunga ilanngullugu isumaqatiginninniarnernerup ingerlanerani ilanngunneqartunik, tigussaasunik tunngaviusunillu isummersuutininik pingaarutilinnik aqutsisoqatigiit tapersiillutik.

Siuliani taakkartorneqarlutik soqutigisaqatigiinnit tamanit kissaatit 2018-imit katersorneqarput.

Ilaasunik angallassineq pillugu kiffartuussinissamik isumaqatigiissusiornissaq sioqqullugu, matumani Qeqertarsuup Tunuani angallassinissamik isumaqatigiissut ilanngullugu, isumaqatiginninniarnernerit aamma ingerlanneqarput.

Isumaqatigiissutissat aasaq manna isumaqatigiissutigineqarsimagaluarpata pitsaanagerusimasinnaaneranut Naalakkersuisut isumaqataapput. Isumaqatigiissutissanik nukingerluni isumaqatiginninniarniarnermi kinguneqaataasussat annikitsumik kinguaattoornermi kinguneqaataasussanut annikinnerusunut sanilliukkaanni, inuiaqatigiinnut Nunattalu karsianut sunniutaasussat annertunerujussuusimassallutik.

Taamaalilluni ataatsimut isigalugu nalilernerqarsinnaavoq, apeqqutaammi matumani oqamisaarutigineqaraluartoq Naalakkersuisut suliami matumani arriisaarlutik suliaqanngimmata, illuatungaaniili suliarilluaqqissaarussimallugu.

Apeqqut 3: Sullissinissamut isumaqatigiissutit angallattunut tamanut, taakku sumi najugaqartuunerat apeqqutaatinnagu, assigiimmik tunngavissaqartitsissappat – taamaalilluni taakku piffinni takornariartitsinermik ikorfartuisinnaaqqullugit?

Akissut: Apeqqutip 2-p akineqarnerani suliami annertuumi nassuiaatigineqartumi, sumiluunniit najugaqaraluaaraanni angalasunut atugassarititaasut

assigiitsinneqarnissaannik kissaateqarneq Naalakkersuisut tusaaniarsimavaat. Sulialli politikikkikut suliarineqarnerani angusaq sunaassanersoq apeqqutaassaaq.

Apeqqu 4: Sullissinissamik isumaqatigiissutit atortuutinik nutarterinissamut qularnaarisuussappat, taamaaliornikkut ukiuni kingullerni kinguaattooqattaarnerit annikillisinneqarsinnaaqqullugit?

Akissut: Air Greenland-ip nalunaarutigaa, timmisartuussiliveqatigiiffiup Bell 212-iutai qulimiguulinnik nutaanerusunik taarsersorneqassasut. Tamatumanili suliap politikikkikut suliarineqarnissaa apeqqutaassalluni.

Apeqqu 5: Sullissinissamut isumaqatigiissutit maanna atuuttut atorunnaarfissaat ukiuni sisamani ilisimaneqareerpoq – isumaqatiginninniarnert suli naammassineqannginnerannut suna patsisaava?

Akissut: Kiffartuussinissamik isumaqatigiissutit massakkut atuuttut atorunnaarfissaat Naalakkersuisut ilisimaaraat, paasissutissiissutigineqassaarlu angallaviit ingerlatsisullu akornanni nikingammata. Apeqqu 2-mut akissut innersuussutigineqarpoq.

Apeqqu 6: Naalakkersuisut takornariartitseqatigiinnut kaaviiartitanik annaasaqartunik taarsiissuteqarnissamik neqerooruteqalersaarpat, taakku ilaasunik angallassinnaannginneq pissutigalugu 2021-mi ukiuunerani neqeroorutiminnik tuniniaasinnaannginnerat pissutigalugu?

Akissut: Naamik. Konto pingaarneq 72.20.05 aqutigalugu takornarialerisunut tapiissuteqarnissamut aningaasaliissutitigut tunngavissaqanngilaq.

Apeqqu 7: Ilaasunik angallassineq pitsaanerulersinniarlugu, ulluni 20. aamma 21. marts 2019-mi attaveqatigiinnermut isumasioqatiginnermi kaammattuutit sorliit Qeqertarsuup tunuani sullissinissamik isumaqatigiissutinut Naalakkersuisut ilanngutilersaarpaat?

Akissut: Apeqqu 2-mut akissuteqaat takuuk. Kissaatigineqartut tamakkerlugit kiffartuussinissami isumaqatigiissutissanut ilanngunneqarnissaat Naalakkersuisut ersarissumik anguniagaraat. Naalakkersuisut isumaqarput, kissaatigineqartut amerlanerpaartaat isumaqatigiissutissanut ilanngunneqartut. Taamaakkaluortoq erseqqissaatigerusuppara, kissaatigineqartut aningaasartuuteqarnissamik kinguneqartuaannarmata. Tamatuma saniatigut angusassami, isumaqatiginninniarnermi angusat apeqqutaassapput. Suliaq suli politikikkikut suliarineqanngimmat, kiffartuussinissamilu isumaqatigiissutissat suli akuersissutigineqanngimmata Naalakkersuisut ersarinnerusumik itisiliisinnaanngillat.

Neriuppunga apeqquteqaatitit qulaani allaqqasuni akineqartut.

Inussiarnersumik inuulluaqqusillunga


Karl Frederik Danielsen